

GODINA: XVII

BROJ: 266

DATUM: 28.08.2020.GODINE



Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja
fax: + 387 33 552 810
selma@sogfbih.ba

• FINANSIJSKO SAVJETOVALIŠTE:

Gregor Jurišić, viši suradnik za finansijska pitanja
fax: + 387 33 552 810
gregor.jurismic@sogfbih.ba

Sadržaj biltena:

Savez u punom kapacitetu u funkciji svojih članica i u vremenu pandemije koronavirusa

Aktivnosti Predsjedništva Saveza u vrijeme stanja nesreće u FBiH

Vlada FBiH donijela odluku o raspodjeli tekućih transfera JLS

Inicijative, upiti i zahtjevi Saveza prema višim nivoima vlasti

Gostovanja direktorice Saveza u TV medijima

Direktorica Saveza dobitnica nagrade "Večernjakov pečat"

Izbor najboljih praksi u ReLOaD partnerskim JLS

Radionice o Nacrtu zakona o građevinskom zemljištu

Webinari organizovani u saradnji sa Savezom

Izveštaj - Benchmarking upravljanja čvrstim otpadom u Jugoistočnoj Evropi

Održana sjednica Generalne skupštine Nalas-a

Sastanak sa Asocijacijom općina Turske

Bilten Saveza općina i gradova Federacije Bosne i Hercegovine

SAVEZ OPĆINA I GRADOVA FEDERACIJE BOSNE I HERCEGOVINE U PUNOM KAPACITETU U FUNKCIJI SVOJIH ČLANICA I U VREMENU PANDEMIJE KORONAVIRUSA

Povodom narušene sigurnosti građana Federacije Bosne i Hercegovine i vanrednih okolnosti u radu i funkcionisanju lokalnih uprava uzrokovanih pojavom pandemije koronavirusa (COVID - 19) i proglašenja stanja nesreće, Savez općina i gradova Federacije Bosne i Hercegovine zadržao je maksimalan nivo komunikacije i saradnje sa svojim članicama, ali i višim nivoima vlasti u svrhu pružanja doprinosa prevenciji i suzbijanju epidemije koronavirusa, kao i pružanju pomoći i asistencije u organiziranju i radu naših članica u vanrednim okolnostima.



Vlada Federacije BiH 16.03.2020. godine donijela je Odluku o proglašenju stanja nesreće uzrokovane pojavom koronavirusa na području Federacije Bosne i Hercegovine. Shodno toj odluci, a radi provođenja mjera zaštite i spašavanja ljudi na ugroženom području, Vlada FBiH zadužila je sve federalne institucije da se stave na raspolaganje Federalnom štabu civilne zaštite (FŠCZ), kao i kantonalne i općinske/gradske štabove civilne zaštite da stave na raspolaganje sve raspoložive resurse koji će se koristiti na ugroženim područjima. Federalni štab civilne zaštite dobio je zaduženje da preuzme sve aktivnosti oko koordinacije i rukovođenja akcijama zaštite i spašavanja ljudi na ugroženom području.

U skladu sa ovim izrazito vanrednim okolnostima i mjerama koje je Vlada FBiH donijela, Savez općina i gradova FBiH u svom punom kapacitetu stavio se na raspolaganje svojim članicama.

Savez je uredno pratio rad Vijeća ministara BiH, Vlade Federacije BiH, Federalnog štaba civilne zaštite i redovno informisao općine/gradove o svim promjenama i novonastalim situacijama. Praćene su mjere koje općine i gradovi poduzimaju po pitanju proglašenja stanja nesreće na području Federacije BiH i te informacije uredno razmjenjivane među članicama.

U tijesnom dogovoru sa članicama upućivane su inicijative koje su imale za cilj da olakšaju rad i funkcionisanje organa lokalnih vlasti i da pomognu na suzbijanju epidemije.

U ovoj brošuri naveli smo najznačajnije aktivnosti koje je Savez poduzimao u periodu od marta do kraja juna 2020. godine, a koje se najviše tiču vanrednih okolnosti. Tu su, između ostalog, vanredne online sjednice Predsjedništva Saveza, inicijative i urgencije koje su upućivane vlastima, stavovi Saveza u vezi sa izmjenama zakona i raspodjelom tekućih transfera itd.

Također, u brošuri smo naveli TV gostovanja direktorice Saveza na kojima su promovirani zahtjevi, stavovi i interesi Saveza općina i gradova FBiH vezani za zaključke i odluke Predsjedništva Saveza.

Djelovanje Saveza općina i gradova FBiH i u ovim vanrednim okolnostima potvrdilo je kako u ostvarivanju svoje misije ne smijemo nailaziti na prepreke koje će nas zaustaviti. Savez se pokazao kao zagovornik koji dosljedno brani i promovira interese lokalnih zajednica, a jedino zajedničkim djelovanjem i istupanjem sa članicama moguće je kvalitetno i uspješno ostvariti interese.




AKTIVNOSTI PREDsjedništva SAVEZA ZA VRIJEME STANJA NESREĆE U FEDERACIJI BiH

U vanrednom periodu, a nakon što je Vlada Federacije BiH svojom odlukom od 16.03.2020. godine proglasila stanje nesreće uzrokovane pojavom koronavirusa na području Federacije Bosne i Hercegovine, Predsjedništvo Skupštine Saveza općina i gradova Federacije Bosne i Hercegovine održalo je tri vanredne i jednu redovnu online sjednicu. Vanredne sjednice su održane 01.04.2020., 15.04.2020. i 11.05.2020. godine, i redovna 29.06.2020. godine. Na ovim sjednicama su razmatrana najvažnija pitanja i izazovi sa kojima su se općine i gradovi suočavali u vrijeme vanrednih okolnosti izazvanih pandemijom koronavirusa.

Predsjedništvo Skupštine Saveza je 01.04.2020. godine održalo **Prvu online sjednicu** na kojoj su usvojeni sljedeći zaključci:

- Naglašava se potreba redovnog zasjedanja Parlamenta Federacije Bosne i Hercegovine, kao i svih drugih institucija u Federaciji Bosne i Hercegovine;
 - Insistira se na osiguravanju nesmetanog rada oba doma Parlamenta Federacije BiH i strogo poštivanju parlamentarne procedure na način da se sve izmjene zakonskih propisa razmatraju i usvajaju putem redovne parlamentarne procedure;
 - U vezi sa Zakonom o korištenju sredstava od naknade za izgradnju javnih skloništa za pomoć građanima i privrednim i drugim subjektima za sprječavanje i otklanjanje posljedica pandemije uzrokovane koronavirusom (COVID 19), čije je usvajanje predložio Dom naroda Parlamenta Federacije BiH po hitnom postupku, Predsjedništvo Saveza zahtijeva da se sredstva ostvarena po osnovu naknade za izgradnju javnih skloništa uplaćuju na račune općinskih/gradskih budžeta, te da načelnici/gradonačelnici donose propise o uvjetima, postupku, kriterijima i načinu korištenja tih sredstava.
 - Zahtijeva se od Vlade Federacije BiH, Parlamenta Federacije BiH i svih vlada kantona u Federaciji BiH da, u cilju ublažavanja ekonomskih posljedica prouzrokovanih pojavom koronavirusa (COVID 19), hitno donesu odluke o privremenim izmjenama propisa o načinu korištenja namjenskih sredstava u budžetima, prema nadležnostima viših nivoa vlasti, koji proizilaze iz sljedećih zakonskih i podzakonskih akata: Zakon o građenju Federacije BiH, Odluka o uvjetima i načinu korištenja sredstava od naknada za zaštitu od prirodnih i drugih nesreća (akumuliranih sredstava) Federacije BiH, kantonalnih Zakona o prostornom uređenju, kantonalnih Zakona o privremenom korištenju javnih površina, Uputa o načinu uplate i trošenju naknade za izgradnju i održavanje javnih skloništa, ukoliko određeni nivoi vlasti ili institucije imaju više raspoloživih sredstava iz ovih izvora;
 - Zahtijeva da se odobri mogućnost preusmjerenja sredstava od naknada za korištenje šuma, koncesija, katastra, sredstava za održavanje i izgradnju cesta za pomoć u saniranju posljedica izazvanih pandemijom koronavirusa;
 - Snošenje tereta finansijske krize uzrokovane zbog posljedica pandemije koronavirusa mora ići „odozgo“ prema „dolje“, odnosno od državnog nivoa vlasti prema lokalnom nivou vlasti;
 - Traži se od Vlade Federacije BiH da sva svoja raspoloživa finansijska sredstva iz budžeta usmjeri u ublažavanje posljedica krize izazvane pandemijom koronavirusa, s naglaskom na očuvanje radnih mjesta i zaštitu zdravstvenog sistema, odnosno građana;
 - Zahtijeva se od Vlade Federacije BiH i svih kantonalnih vlada da hitno donesu kompletan set konkretnih mjera (po resorima) za očuvanje radnih mjesta i spas privrede na području Federacije BiH, uvažavajući prijedloge Predsjedništva Saveza i da se te mjere upute u parlamentarnu proceduru;
 - Apeluje se prema Vijeću ministara BiH da se ubrza izvoz, odnosno protok naših roba i proizvoda na graničnim prelazima Bosne i Hercegovine i da se omogući da se robe i proizvodi mogu izvoziti i preko graničnih prijelaza „Izačić“, „Orašje“, „Kamensko“ i svih ostalih prelaza. Također, tražimo da se razmotri mogućnost stavljanja u funkciju carinskog terminala u Orašju;
 - Traži se od Vlade Federacije BiH da općinama i gradovima prebaci sredstva planirana za poljoprivredu, kako bi se mogla realizirati sjetva i da isplati zaostale poticaje za poljoprivrednike;
 - Traži se od Vlade Federacije BiH da osigura minimalnu plaću za period od tri mjeseca za one radnike kojima je obustavljen rad uslijed mjera Federalnog štaba civilne zaštite, pod uslovom da ne ugase djelatnost/obrt i da ne otpuštaju radnike, a da im se plaćanje doprinosa odgodi na tri mjeseca;
 - Od Federalnog štaba civilne zaštite zahtijeva se preispitivanje mjere zabrane kretanja osoba mlađih od 18 i starijih od 65 godina, jer je trenutno vrijeme sjetve, i potrebno je da i ove kategorije stanovništva učestvuju u obavljanju tih poslova.
- Savez općina i gradova FBiH je usvojene zaključke uputio nadležnim institucijama (Vijeće ministara BiH, Parlament FBiH, Vlada Federacije BiH, Federalni štab civilne zaštite, kantonalne vlade) i očekuje njihova očitovanja.



**KORISNI LINKOVI ZA FONDVE
EU:**

www.southeast-europe.net
www.adriaticinnovationmap.eu
www.adrioninterreg.eu
www.europa.ba
www.cbibplus.eu
www.cbc.bih-mne.org
www.srb-bih.org
www.interreg-hr-ba-me2014-2020.eu
www.programmmed.eu
<https://tacso.eu/>
<https://euinfo.ba/en/>
www.balkanfund.org
<https://eacea.ec.europa.eu>
www.welcomeurope.com

Vlada Federacije BiH je
 uvažila zahtjev
 Predsjedništva Saveza i
 amandmanom na
 rebalans budžeta
 Federacije BiH, koji je
 usvojen na oba doma
 Parlamenta Federacije
 BiH, osigurala tekuće
 transfere u iznosu od
 30 miliona KM za
 raspodjelu općinama i
 gradovima u Federaciji
 BiH.

Druga sjednica

Druga online sjednica Predsjedništva Saveza održana je 15.04.2020. godine povodom prijedloga Zakona o ublažavanju negativnih ekonomskih posljedica kojeg je utvrdila Vlada Federacije BiH i uputila ga u parlamentarnu proceduru, te u vezi sa raspodjelom finansijskih sredstava od kredita Međunarodnog monetarnog fonda. Predsjedništvo Saveza je pored ovoga, raspravljalo i o zaključku Centralne izborne komisije BiH o pokretanju inicijative za izmjene Izbornog zakona BiH, kojim bi se omogućila eventualna odgoda lokalnih izbora, kao i o nizu drugih pitanja.

Predsjedništvo Saveza je utvrdilo zahtjeve i zaključke po pitanju seta ekonomskih mjera Vlade Federacije BiH, kako slijedi:

- Insistira da Vlada Federacije BiH Zakonom o ublažavanju negativnih ekonomskih posljedica osigura subvencioniranje minimalnih plaća uposlenicima u poslovnim subjektima, kojima je obustavljen, onemogućen i zabranjen rad temeljem odluka organa vlasti i Federalnog štaba civilne zaštite, kako bi se zaštitile ove kategorije stanovništva i sačuvala njihova radna mjesta;
- Zahtijeva da se naglasi da se prenamijenjena namjenska sredstva koriste isključivo za namjene saniranja zdravstvenih, socijalnih i ekonomskih posljedica proglašenja stanja nesreće;
- Zahtijeva da se upravni postupci ne prekidaju za vrijeme trajanja stanja nesreće na području Federacije BiH.

Što se tiče raspodjele sredstava Međunarodnog monetarnog fonda u dogovorenom iznosu od 330 miliona eura, Predsjedništvo Saveza insistira da jedinice lokalne samouprave u Federaciji BiH moraju učestvovati u raspodjeli sredstava od kredita Međunarodnog monetarnog fonda jer će općine i gradovi učestvovati u otplati ovog duga temeljem nepravednog umanjivanja osnovice za raspodjelu prihoda od indirektnih poreza. Naglašeno je da se općine i gradovi u Federaciji BiH konstantno suočavaju s nedostatkom finansijskih sredstava, jer su im prihodi kontinuirano nepravedno umanjivani temeljem sistema otplate vanjskog duga Federacije BiH, pri kojemu se iznos otplate vanjskog duga, koji je najvećim dijelom rezultat zaduživanja viših nivoa vlasti, oduzima od iznosa prihoda od indirektnih poreza prije raspodjele ovih prihoda po pojedinačnim nivoima vlasti. Na ovaj način općine i gradovi su primorane otplaćivati vanjski dug koji načine kantonalni i federalni nivo vlasti.

Upozoreno je da problem nedostatka finansijskih sredstava u općinskim i gradskim budžetima posebno dolazi do izražaja u ovoj situaciji, što bi moglo finansijski ugroziti općinske i gradske budžete i dovesti u pitanje funkcionalnost pojedinih jedinica lokalne samouprave u Federaciji BiH. Također, podržana je inicijativa Grada Cazina za izmjenu naredbe Federalnog štaba civilne zaštite, kojom je svim osobama koja ulaze u Bosnu i Hercegovinu naređena obavezna mjera karantena po rješenju Federalnog ministarstva zdravstva. Zbog problema u izvršavanju ove naredbe u smislu sporosti procedura prilikom trijaže i izdavanja rješenja, Predsjedništvo Saveza traži da se naredbom Federalnog štaba propiše da sve osobe koje ulaze u Bosnu i Hercegovinu obvezno prođu kroz trijažne šatore na graničnim prelazima, te da se odmah kod istih lica izvrši testiranje na koronavirus - COVID 19 i da se u slučaju negativnog nalaza licima određuje mjera samoizolacije, dok bi se u slučaju pozitivnog nalaza osobe trebale upućivati u medicinske ustanove pod liječnički nadzor.

Predsjedništvo Saveza se izjasnilo i oko inicijative Centralne izborne komisije BiH o izmjenama Izbornog zakona, kojim bi se uveo pojam vanrednih okolnosti i regulacija eventualne odgode izbora, dajući podršku zaključku Centralne izborne komisije, pri čemu se potenciraju i raniji zahtjevi Saveza za objedinjavanjem održavanja općih i lokalnih izbora u istoj kalendarskoj godini. Na taj način, Predsjedništvo Saveza podržava da se naredni opći i lokalni izbori održe 2022. godine, smatrajući to troškovno isplativijim i opravdanim.

S obzirom da je Vlada Federacije BiH odlučila poništiti raspodjelu transfernih sredstava nižim nivoima vlasti, Predsjedništvo Saveza je zauzelo jasan stav da se uz prethodno utvrđene transparentne kriterije za raspodjelu, finansijska sredstva u iznosu od 21 milion KM, koja su u budžetu Federacije BiH bila planirana za kantone i lokalne zajednice, vrate kao pomoć budžetima općina, gradova i kantona.

Treća sjednica

Treća online sjednica Predsjedništva Saveza je održana 11.05.2020. godine. Na ovoj sjednici se diskutovalo o načinu raspodjele tekućih transfera u iznosu od 30 miliona KM, koji su rebalansom budžeta Federacije BiH osigurani za raspodjelu općinama i gradovima u Federaciji BiH.

S obzirom da je Vlada Federacije BiH prethodno poništila odluku o raspodjeli transfernih sredstava nižim nivoima vlasti, na sjednici Predsjedništva Saveza, održanoj 15.4.2020. godine, načelnici i gradonačelnici su zauzeli jasan stav da se finansijska sredstva, koja su u budžetu Federacije BiH bila planirana za lokalne zajednice, moraju vratiti u federalni budžet kao pomoć



budžetima općina i gradova. Prepoznajući značajnu ulogu općina i gradova u suočavanju sa situacijom i izazovima uzrokovanim stanjem nesreće zbog pandemije koronavirusa COVID - 19, Vlada Federacije BiH je uvažila ovaj zahtjev Predsjedništva Saveza i amandmanom na rebalans budžeta Federacije BiH, koji je usvojen na oba doma Parlamenta Federacije BiH, osigurala tekuće transfere u iznosu od 30 miliona KM za raspodjelu općinama i gradovima u Federaciji BiH.



Predsjedništvo Saveza predlaže da se Odlukom Vlade Federacije BiH o raspodjeli sredstava od tekućih transfera, u skladu sa principima humanosti i solidarnosti, iznos od 30 miliona KM tekućih transfera namijenjen općinama i gradovima iz federalnog budžeta ravnopravno i jednako rasporedi na svih 80 jedinica lokalne samouprave u Federaciji BiH, tako da svaka općina i grad dobije jednak iznos transfernih sredstava, po 375.000 KM. Ovakav jednak način raspodjele transfernih sredstava općinama i gradovima odražavao bi jednakopravan tretman svih jedinica lokalne samouprave u Federaciji BiH.

Predsjedništvo Saveza je pri tome naglasilo da bi se općinskim i gradskim vlastima trebalo osigurati da samostalno i slobodno raspolazu dodijeljenim sredstvima, kako ne bi došlo do finansijske ugroženosti općina i gradova u Federaciji BiH.

Od Federalnog ministarstva finansija/finansija očekujemo da razmotri i usvoji ovaj zahtjev Saveza.

Četvrta sjednica

Predsjedništvo Saveza je, na svojoj 4. online sjednici koja je održana 29.06.2020. godine ostalo pri svojoj ranijoj odluci kojom je predložilo Vladi Federacije BiH da donese Odluku o raspodjeli sredstava od tekućih transfera, kojom bi se, sukladno principima humanosti i solidarnosti u trenutnoj situaciji, iznos od 30.000.000 KM tekućih transfera namijenjen općinama i gradovima iz federalnog proračuna/budžeta ravnopravno i jednako rasporedio na svih 80 jedinica lokalne samouprave u Federaciji BiH, tako da svaka općina i grad dobije jednak iznos transfernih sredstava - 375.000 KM. Ovakav jednak način raspodjele transfernih sredstava općinama i gradovima odražavao bi jednakopravan tretman svih jedinica lokalne samouprave u Federaciji BiH.

Na sjednici je pored ostalog, diskutirana Politika jačanja finansijske pozicije općina i gradova u Federaciji BiH i prijedlog Strategije javnog zagovaranja ove politike. Ova Politika predstavlja analitički zasnovanu, argumentiranu i validnu osnovu Saveza za neophodne izmjene Zakona o pripadnosti javnih prihoda u Federaciji BiH, s ciljem finansijskog jačanja pozicije općina i gradova u Federaciji BiH u raspodjeli javnih prihoda, jer postoji nesrazmjer između pripadajućih prihoda i objektivnih rashodovnih potreba općina i gradova.

Politika Saveza kao odgovor na problem nepovoljne finansijske pozicije općina i gradova je: (1) povećanje udjela općina i gradova u Federaciji BiH u raspodjeli prihoda od indirektnih poreza sa sadašnjih 8,42% na 9,81%, što bi nadoknadilo iznos umanjenja prihoda nastao temeljem otplate vanjskog duga viših razina vlasti; te (2) povećanje udjela općina i gradova u Federaciji BiH u raspodjeli prihoda od izravnih poreza (poreza na dohodak i poreza na dobit).

Okosnica Politike jačanja finansijske pozicije JLS u Federaciji BiH zapravo je vraćanje javnog novca bliže građanima. Općine i gradovi su razina vlasti najbliža građanima, koja poznaje njihove svakodnevne probleme i zadovoljava njihove osnovne potrebe za javnim uslugama, te daje najopipljivije rezultate. Stoga, slabom finansijskom pozicijom općina i gradova u Federaciji BiH ugroženi su kvaliteta života građana i lokalni ekonomski razvoj.

Također je usvojena i Strategija javnog zagovaranja jačanja finansijske pozicije JLS u Federaciji BiH, u okviru koje su naznačeni i definirani koraci, kojim će Savez u narednom periodu komunicirati i predstavljati ove politike predstavnicima zakonodavne i izvršne vlasti u Federaciji BiH, predstavnicima međunarodne zajednice kao i javnosti.

Na sjednici je bilo riječi i o problemima izazvanim poplavama u Tuzlanskom kantonu, te će u vezi s tim, Savez uputiti molbu nadležnim organima za pružanje hitne pomoći područjima pogođenim poplavama imajući u vidu da se radi o situaciji koja zahtjeva urgentno postupanje

Pored navedenog, Predsjedništvo je usvojilo zapisnik sa sjednice skupštinskih komisija Saveza, kao i zapisnik sa sjednice Nadzornog odbora Saveza.

Članovi Predsjedništva su na znanje primili različite informacije kao što su informacije o aktivnostima Saveza vezano za Nacrt zakona o građevinskom zemljištu, Nacrtu zakona o dugu, zaduživanju i garancijama Federacije BiH, informacije sa održanih kantonalnih sastanaka sa jedinicama lokalne samouprave u Tuzlanskom kantonu, Unsko-sanskom kantonu i zajedničkom sastanku za Hercegovačko-neretvanski kanton, županiju Zapadnohercegovačku i Hercegbosansku županiju.



Politika Saveza kao odgovor na problem nepovoljne finansijske pozicije općina i gradova je: povećanje udjela općina i gradova u Federaciji BiH u raspodjeli prihoda od indirektnih poreza na 9,81%, te povećanje udjela općina i gradova u raspodjeli prihoda od izravnih poreza

VLADA FBiH DONIJELA ODLUKU O RASPODJELI TEKUĆIH TRANSFERA JEDINICAMA LOKALNE SAMOUPRAVE

Na sjednici održanoj 2.07.2020. godine Vlada Federacije BiH je donijela odluku o načinu raspodjele tekućih transfera općinama i gradovima. U odluci je Vlada djelimično usvojila prijedlog Saveza općina i gradova Federacije BiH o jednakoj i ravnopravnoj raspodjeli planiranog iznosa tekućih transfera svim općinama i gradovima u FBiH na načelima solidarnosti i humanosti, jer će se dio transfernih sredstava (10 milijuna KM, što je jedna trećina ukupnog iznosa) raspodijeliti u jednakom iznosu svim općinama i gradovima u FBiH. Dakle, djelimično uvažavanje prijedloga SOGFBiH i usvajanje odluke o načinu raspodjele u ovom obliku znači da prijedlog Saveza općina i gradova FBiH nije ignoriran.



Sa sjednice Vlade FBiH

Naime, Vlada Federacije Bosne i Hercegovine je na svojoj 288. sjednici u Sarajevu donijela Odluku o utvrđivanju kriterija raspodjele sredstava utvrđenih Proračunom FBiH za 2020. godinu Federalnom ministarstvu financija na poziciji tekućih transfera općinama i gradovima u FBiH u iznosu od 30.000.000 KM.

Od ovog iznosa, 10.000.000 KM je dodijeljeno na načelu solidarnosti svim gradovima i općinama u jednakom iznosu od 125.000 KM, na ime finansijske pomoći proračunu u sanaciji posljedica nastalih uslijed proglašene pandemije COVID-19.

Daljnjih 20.000.000 KM dodijeljeno je gradovima i općinama za sufinansiranje projekata, zahtjeva i inicijativa, a na temelju javnog poziva.

Projekti, zahtjevi i inicijative odnose se na cestovnu infrastrukturu (ceste, mostovi, potporni i zaštitni zidovi, kružni tokovi, parkirališta, pješačke i biciklističke staze, sanacija klizišta i sprječavanje erozije), zatim na komunalnu infrastrukturu (vodovod i kanalizacija, javna rasvjeta, energetske i komunikacijske mreže, plinske i niskonaponske mreže), objekte obrazovnog, sportskog i kulturnog karaktera (predškolski objekti, školski objekti, dječja igrališta i igraonice, školsko-sportske dvorane i igrališta), te na ostale objekte od značaja za jedinice lokalne samouprave (domovi kulture, društveni domovi, knjižnice, zdravstveni objekti, muzeji i slični objekti društvene namjene, povećanje energetske efikasnosti objekata, fasade, zamjena otvora i krovova, sustavi grijanja i hlađenja).

Sredstva su predviđena i za pomoć proračunima gradova i općina za financiranje tekućih rashoda. Vlada FBiH je, stupanjem na snagu ove odluke, na svojoj web stranici i u dnevnim novinama, objavila javni poziv za podnošenje prijava za sufinansiranje projekata, zahtjeva i inicijativa. Također, formirano je povjerenstvo s ciljem pregledanja i ocjene dostavljenih projekata, zahtjeva i inicijativa, te sačinjavanja prijedloga korisnika sredstava. Na temelju toga je Federalno ministarstvo financija pripremlilo prijedlog konačne odluke i dostavilo ga Vladi FBiH na razmatranje.

Federalna vlada je na sjednici održanoj 29.7.2020. godine donijela „Odluku o raspodjeli sredstava utvrđenih Budžetom Federacije Bosne i Hercegovine za 2020. godinu Federalnom ministarstvu financija s pozicije Tekući transferi drugim nivoima vlasti i fondovima - kantoni i općine”. Ovom odlukom se utvrđuje konačna raspodjela transfernih sredstava u iznosu od 30 mil. KM na ime dodjele finansijske pomoći proračunima/budžetima gradova i općina u sanaciji posljedica nastalih uslijed proglašene pandemije COVID-19 i za sufinansiranje projekata/zahtjeva/inicijativa. Ovom odlukom je Vlada utvrdila konačne iznose i dinamiku doznačavanja sredstava pojedinim gradovima i općinama, te način izvješćivanja o njihovom utrošku.

Ovakvim načinom raspodjele djelomično je ispoštovan prijedlog Predsjedništva Saveza općina i gradova Federacije BiH, koje je predložilo Vladi Federacije BiH da se, sukladno načelima solidarnosti i humanosti, iznos od 30.000.000 KM tekućih transfera namijenjen općinama i gradovima iz federalnog proračuna/budžeta ravnopravno i jednako rasporedi na svih 80 jedinica lokalne samouprave u FBiH, tako da svaka općina i grad dobije jednak iznos transfernih sredstava - 375.000 KM. Ovakav jednak način raspodjele transfernih sredstava općinama i gradovima odražavao bi jednakopravan tretman svih jedinica lokalne samouprave u FBiH.

KORISNI LINKOVI ZA FONDOVE

EU:

www.southeast-europe.net
www.adriaticinnovationmap.eu
www.adrioninterreg.eu
www.europa.ba
www.chibplus.eu
www.cbc.bih-mne.org
www.srb-bih.org
www.interreg-hr-ba-me2014-2020.eu
www.programmmed.eu
<https://tacso.eu/>
<https://evinfo.ba/en/>
www.balkanfund.org
<https://eacea.ec.europa.eu>
www.welcomeurope.com

10 milijuna KM se
raspoređuje
ravnopravno i jednako
svim općinama i
gradovima, a 20
milijuna KM na
temelju javnog poziva.



INICIJATIVE, UPITI I ZAHTJEVI SAVEZA PREMA VIŠIM NIVOIMA VLASTI

Putem rada Predsjedništva Skupštine Saveza općina i gradova FBiH, kao i u tijesnom dogovoru sa našim članicama Savez je upućivao inicijative prema višim nivoima vlasti koje su imale za cilj da olakšaju rad i funkcionisanje organa lokalnih vlasti, pomognu u suzbijanju epidemije, pomognu u rješavanju neuređenih pitanja koja prevazilaze nadležnost lokalne samouprave itd.

Ispod su navedene inicijative, zahtjevi, upiti i urgencije koje je Savez uputio višim nivoima vlasti u protekla tri mjeseca. Uvid u pristigle odgovore možete izvršiti klikom na postavljene linkove ispod.

- Upućen apel prema Vijeću ministara BiH za ubrzanjem izvoza, odnosno protoka naših roba i proizvoda na graničnim prelazima Bosne i Hercegovine, te da se omogući da se robe i proizvodi mogu izvoziti i preko graničnih prelaza „Izačić“, „Orašje“ „Kamensko“ i svih ostalih graničnih prelaza. Takođe smo tražili da se razmotri mogućnost stavljanja u funkciju carinskog terminala u Orašju. Apel upućen 03.04.2020. godine.

- Na inicijativu jedinica lokalne samouprave sa područja Kantona Sarajevo za dodatno pooštavanje mjera koje je donio Federalni štab civilne zaštite, Savez je 18.03.2020. godine uputio inicijativu Vladi Kantona Sarajevo kojom se traži reduciranje broja postojećih linija javnog prevoza, ograničavanje korištenja javnog prevoza i uklanjanje migranata sa ulica u prihvatljive objekte.

- Upiti upućeni Vladi FBiH 27.03.2020. godine u vezi sa reorganizacijom rada općinskih / gradskih službi u kontekstu provođenja preporuka kriznih štabova: Kakav je status uposlenika koji rade od kuće? Na koji način će se voditi evidencija radnog vremena, da li će se uposlenicima koji rade od kuće računati puno radno vrijeme? Da li je u svakom pojedinačnom slučaju potrebno donositi rješenje ili neki drugi akt kojim se uposlenik upućuje na rad od kuće? Da li će se uposlenicima koji rade od kuće isplaćivati naknade za prevoz i topli obrok? Odgovor na upite možete pogledati na sljedećem linku: [Odgovor FMRiSP](#)

- Kako Predsjedništvo Saveza nije bilo u potpunosti zadovoljno sa odgovorom Federalnog ministarstva rada i socijalne politike, 6.05.2020. godine upućena je urgencija za davanje preciznijeg odgovora. Odgovor na urgenciju možete pogledati na sljedećem linku: [Odgovor FMRiSP 2](#)

- Savez je 05.05.2020. godine je na adresu Federalnog ministarstva trgovine, Federalnog ministarstva razvoja, poduzetništva i obrta i Federalnog ministarstva okoliša i turizma poslao upit vezan za provjeru nadležnosti nad regulisanjem radnog vremena trgovačkim, ugostiteljskim i obrtničkim radnji u normalnim okolnostima: Da li općina/grad ima nadležnost regulisanja radnog vremena u trgovačkim, ugostiteljskim i obrtničkim radnjama, odnosno da li općina/grad može zabraniti rad nedjeljom trgovinama i na koji način može urediti rad nedjeljom? Odgovore možete pogledati na sljedećim linkovima: [Odgovor FMT](#), [Odgovor FMRPiO](#), [Odgovor FMOiT](#).

- Predsjedništvo Saveza je 12.05.2020. godine Vladi Federacije BiH uputilo Odluku o prijedlogu načina raspodjele tekućih transfera općinama i gradovima iz budžeta Federacije Bosne i Hercegovine u iznosu od 30.000.000KM. [Odluka Predsjedništva Saveza](#)

- Savez je 18.05.2020. godine Premijeru FBiH i Federalnoj ministrici finansija uputio inicijativu za sastanak po pitanju načina raspodjele tekućih transfera općinama i gradovima u FBiH iz Budžeta Federacije BiH u iznosu od 30.000.000 KM. Odgovor na inicijativu još uvijek nismo dobili, ali smo od strane Federalnog ministarstva finansija dobili zamolbu za dostavu Godišnjih izvještaja o izvršenju budžeta (GIB) jedinica lokalnih samouprava za 2019. godinu, što je i učinjeno.

- Usljed zatvaranja velikog broja graničnih prelaza u BiH, Predsjedništvo Saveza je 14.05.2020. godine prema Vijeću ministara BiH uputilo sljedeće upite: Po kojim kriterijima su izabrani granični prelazi na kojima je nastavljeno funkcioniranje međunarodnog robnog prometa i kada se može očekivati normalizacija međunarodnog robnog prometa?

- Zahtjev za tumačenje člana 12. Zakona o ublažavanju negativnih ekonomskih posljedica Federacije BiH, odnosno donošenje podzakonskog akta/pravilnika kojim bi se precizno definisale/nabrojale sve vrste namjenskih sredstava iz člana 12. Zakona o ublažavanju negativnih ekonomskih posljedica upućen je Vladi FBiH 15.05.2020. godine. Odgovor na zahtjev možete pogledati na sljedećem linku: [Odgovor FMF](#)

- Inicijativa za oslobađanje jedinica lokalne samouprave obaveze plaćanja poreza na dodanu vrijednost (PDV-a) za usluge od kojih nisu ostvarile prihode, odnosno da nadležni viši nivoi vlasti prate mjere koje su donijele jedinice lokalne samouprave. Inicijativa upućena 4.06.2020. godine Upravi za indirektno oporezivanje BiH i Ministarstvu finansija i trezora BiH. Odgovor Uprave na inicijativu možete pogledati na sljedećem linku: [Odgovor UIO](#)

- Zahtjev za pružanje hitne pomoći području pogođenom poplavom u Tuzlanskom Kantonu upućen je 10.06.2020. godine Vladi Federacije BiH, JP Ceste Federacije BiH d.o.o., Vladi Tuzlanskog kantona i JU Direkcija regionalnih cesta TK.



GOSTOVANJE DIREKTORICE SAVEZA U TV MEDIJIMA

**DIREKTORICA TRAVLJANIN ZA
NTV HAYAT**

17. april / travanj - Direktorica Saveza općina i gradova FBiH, gđa. Vesna Travljanin, gostujući u Vijestima u 7, NTV Hayat govorila je o zaključcima sa zadnje sjednice Predsjedništva Skupštine Saveza koja je održana 15.04.2020. godine.

Govoreći o prijedlogu Zakona o ublažavanju negativnih ekonomskih posljedica istakla je kako je potrebno prilagoditi zakon potrebama građana, odnosno da se u članu 12. doda da se prenamijenjena namjenska sredstva mogu koristiti i za saniranje socijalnih posljedica proglašenja stanja nesreće.

Zatim, istakla je također da se pomenutim zakonom trebaju tretirati poslovni subjekti kojima je odlukama Federalnog štaba civilne zaštite zabranjen ili onemogućen rad na način da se obezbijedi potpuna bruto minimalna plata, a kako bi im se osigurao dohodak i očuvala radna mjesta, jer su ove kategorije trenutno najugroženije.

Nadalje, što se tiče raspodjele sredstava Međunarodnog monetarnog fonda u iznosu od 330 miliona eura, direktorica Saveza je istakla kako se ne smije ponoviti greška iz ranijih aranžmana kojima su jedinice lokalne samouprave bile izuzete i time značajno oštećene.


Prilog sa NTV Hayat možete pogledati na sljedećem linku:

<https://www.youtube.com/watch?v=nTjhCj6KmuY&feature=youtu.be>

**KORISNI LINKOVI ZA FONDVE
EU:**

www.southeast-europe.net
www.adriaticinnovationmap.eu
www.adrioninterreg.eu
www.europa.ba
www.chibplus.eu
www.cbc.bih-mne.org
www.srb-bih.org
www.interreg-hr-ba-me2014-2020.eu
www.programmed.eu
<https://tacso.eu/>
<https://evinfo.ba/en/>
www.balkanfund.org
<https://eacea.ec.europa.eu>
www.welcomeurope.com

Direktorica Saveza je istakla, u kontekstu raspodjele sredstava MMF-a u iznosu od 330 miliona eura, kako se ne smije ponoviti greška iz ranijih aranžmana kojima su jedinice lokalne samouprave bile izuzete i time značajno oštećene.

DIREKTORICA SAVEZA OPĆINA I GRADOVA FEDERACIJE BIH ZA BHRT

Direktorica Saveza općina i gradova FBiH, gđa. Vesna Travljanin, gostovala je u specijalnom programu BHRT-a Koronavirus u BiH u subotu 21.3.2020. godine, govoreći o izazovima, s kojima se susreću općine i gradovi u FBiH u trenutnoj krizi, koja je nastala uslijed pandemije Koronavirusa.

- Općine i gradovi se svakodnevno trude prilagoditi novonastaloj situaciji i naći način, kako bi život

građana bio što normalniji, bolji i zaštićeniji u ovim posebnim i izmijenjenim životnim okolnostima. Očigledno je da načelnici i gradonačelnici u cijeloj FBiH, zajedno sa svojim administracijama, zaista rade, trude se i uspijevaju da dođe do prilagodbi u ovom novom načinu života. U Savezu općina i gradova FBiH trenutno radimo na objedinjavanju svih informacija iz svih jedinica lokalne samouprave u FBiH i zadatak nam je ostvariti svoju temeljnu funkciju, razmjenjivati informacije i informirati i općine i gradove i javnost o mjerama, dobrim praksama i potezima suzbijanja i prevencije rizika od pojave koronavirusa, koje sprovode jedinice lokalne samouprave, - naglasila je gđa. Travljanin.

Odgovarajući na pitanje o kontinuitetu rada općinskih i gradskih administracija u narednim danima, gđa. Travljanin je istaknula da funkcije i rad općinskih i gradskih administracija neće biti dovedeni u pitanje, ali da će restrikcije, svakako, postojati, navodeći da mnoge općine i gradovi već rade sa skraćenim radnim vremenom i online. Pohvalila je sve načelnike i gradonačelnike u FBiH, kao i administracije koje stoje iza njih, jer su vrlo uspješno organizirali svoj rad u ovim specifičnim okolnostima.

- Osim naredbi i preporuka Vlade FBiH i kantonalnih vlada i njihovih kriznih štabova, postoje i općinski i gradski krizni štabovi, gdje se sprovode konkretne mjere i aktivnosti i koji su u najdirektnijem kontaktu s građanima. Potrebna je veća pomoć i potpora jedinicama lokalne samouprave u FBiH, kako bi mogle ostvarivati svoju funkciju, pogotovo prilikom nabave materijala



i provođenja ostalih neophodnih aktivnosti i mjera u ovom kriznom momentu. Potrebno je da viši nivoi vlasti stvarno uvažavaju ono što se događa na terenu, u općinama i gradovima, ali i da sve općine i gradovi i građani poštuju preporuke viših razina vlasti u kriznoj situaciji s koronavirusom, - zaključila je gđa. Travljanin.

Prilog sa BHRT možete pogledati na sljedećem linku od 22:40 minute:

<https://www.youtube.com/watch?v=7btvNbm0Sfg&fbclid=>

Na sljedećim linkovima možete pogledati i druga TV gostovanja:

- Travljanin za Hayat: Bilo je govora da će zadirati u budžete gradova

<https://www.youtube.com/watch?v=9OXg6X2pWC4&feature=youtu.be>

- Emisiji "Bila je to 2019" predstavljeno 150 kandidata koji su u prošloj godini ostavili poseban trag u javnom prostoru BiH

Gosti emisije: direktorica Saveza općina i gradova Federacije BiH, Vesna Travljanin, rektori sarajevskog Univerziteta i Sveučilišta Mostar, Rifat Škrijelj i Zoran Tomić, gradonačelnik Banja Luke Igor Radojičić i predsjednik Vanjskotrgovinske komore BiH, Vjekoslav Vuković.

https://www.youtube.com/watch?time_continue=159&v=gGHuJjtns0Q&feature=emb_title&fbclid=IwAR0QOuYF0g4WG1xhxKbOH6yELCDOj9ddVQQtAdBJ7mJDBBOCxaPJUyIWZs

- Gregor Jurišić: Tekuće transfere iz federalnog budžeta raspodijeliti ravnopravno svim općinama i gradovima

<https://www.youtube.com/watch?v=Gk5hmecF1WU&feature=youtu.be&fbclid=IwAR2v5loq3WVY5LOk7vcYnXsXXNkTJeYz6GNnWcsR-yZyi-ewakn7gdmdSvY>



DIREKTORICA SAVEZA DOBITNICA NAGRADE VEČERNJAKOV PEČAT



Devetnaesto izdanje Večernjakovog pečata, kojim se odaje priznanje osobama iz raznih oblasti javnog života, a koji su dostignutim rezultatima obilježili 2019. godinu i početak 2020. godine održano je 7. juna 2020. godine. Ovogodišnji Večernjakov pečat održao se u jednom novom izdanju: istodobno u nekoliko gradova u BiH i regiji, a putem direktnog prenosa od strane mnogobrojnih BiH ali i regionalnih TV i radio stanica, te medijskih portala i platformi bio dostupan milionskom auditoriju.


Večernjakov pečat, nagrada dnevnih novina Večernji list, je jedan od najvećih društvenih događaja u BiH i jedna od najvažnijih manifestacija takve vrste u regiji. "Europski Oscar", kako ga nazivaju, ističe i nagrađuje osobe, te događaje koji su svojim djelovanjem obilježili godinu. Poseban ocjenivački sud svake godine sa šireg popisa više od tisuću kandidata izabere 150 osoba iz svih sfera života koje se natječu u 15 kategorija za glavnu nagradu "Osoba godine". U bh. izdanju i internetskim izdanjima Večernji list svakog dana objavljuje svih 150 kandidata koji se natječu za Osobu godine, ali i za pobjedu u 15

kategorija. Pored BiH biraju se i regionalne, europske i svjetske osobe.

Žiri urednika i novinara, te glasovi čitatelja izabrali su dobitnike ovog prestižnog natjecanja za 2019-tu godinu.

Vesni Travljanin, direktorica Saveza općina i gradova Federacije BiH na ovoj svečanosti je dodijeljena nagrada Večernjakov pečat za 2019. u kategoriji Ponos BiH - Uspjeh godine.

Vesni Travljanin,
direktorica Saveza općina i
gradova Federacije BiH na
ovoj svečanosti je
dodijeljena nagrada
Večernjakov pečat za 2019.
u kategoriji Ponos BiH -
Uspjeh godine.



Kako se navodi u razlogu nominacije, gospođa Travljanin „u rukama drži ključ svih općina i gradova FBiH. Na čelu Saveza, pod čijim je vodstvom svih 80 jedinica lokalne samouprave s područja većeg bh. entiteta je ušlo u njegovo članstvo. U proteklih 15 godina posvetila se aktivnoj borbi za jačanje pozicije općina i gradova u zemlji i inostranstvu. Vrsna pravница, specijalizirala medijsko pravo na Sveučilištu Maryland u SAD-u. Zahvaljujući njoj, građani imaju svoj glas u pregovorima sa svim razinama vlasti“.

Pri preuzimanju nagrade, gospođa Travljanin je istaknula: „Izuzetna mi je čast i zadovoljstvo što sam dobitnik prestižne nagrade Večernjakov pečat u kategoriji "Ponos BiH -Uspjeh godine". Želim da se zahvalim redakciji Večernjeg lista koja je prepoznala rad i zalaganje. Ova nagrada ne ide lično meni, nego svim općinama i gradovima u FBiH, njihovim načelnicima i uposlenicima, kao i mojim saradnicima. Nagrada će biti podstrek za naš dalji rad i zalaganje i nadam se i uspjeh, jer je lokalna samouprava temelj svakog razvijenog društva i u posljednje vrijeme dobija sve više na značaju. Takođe se koristim prilikom da svim učesnicima u ovom projektu poželim uspjeh i sreću kako u radu tako i ličnom životu“.

U izjavi za medije gospođa Travljanin je istakla da ova nagrada prepoznaje ono što se u svijetu zove „public commitment“ - posvećenost javnom dobru. Projekt ima za cilj potaknuti, prije svega lidere, ali i sve ostale da rade najbolje moguće u korist društvene zajednice, jer samo radom i zalaganjem možemo ostvariti zajedničke ciljeve i mislim da je tu budućost naše zemlje.

KORISNI LINKOVI ZA FONDove EU:

www.southeast-europe.net
www.adriaticinnovationmap.eu
www.adrioninterreg.eu
www.europa.ba
www.cbibplus.eu
www.cbc.bih-mne.org
www.srb-bih.org
www.interreg-hr-ba-me2014-2020.eu
www.programmmed.eu
<https://tacso.eu/>
<https://euinfo.ba/en/>
www.balkanfund.org
<https://eacea.ec.europa.eu>
www.welcomeurope.com

*Odabir najboljih praksi
provodi se u okviru
ReLOaD partnerskih
jedinica lokalne
samouprave iz dvije
tematske oblasti, i to:
Transparentno
finansiranje organizacija
civilnog društva iz
budžeta JLS i Uključenje
građana u procese
donošenja odluka.*

IZBOR NAJBOLJIH PRAKSI U ReLOaD PARTNERSKIM JLS

6. maj / svibanj - Regionalni program lokalne demokratije na Zapadnom Balkanu (ReLOaD) u saradnji sa Savezom općina i gradova Federacije Bosne i Hercegovine (SOGFBiH) i Savezom opština i gradova Republike Srpske (SOGRS) provodi odabir najboljih praksi u okviru ReLOaD partnerskih jedinica lokalne samouprave (JLS) iz dvije tematske oblasti:

- Transparentno finansiranje organizacija civilnog društva iz budžeta JLS

- Uključenje građana u procese donošenja odluka

Cilj ove aktivnosti je da se najbolje prakse prepoznaju i promoviraju te se na taj način podstaknu i druge JLS da uvedu transparentne procedure u proces dodjele sredstava organizacijama civilnog društva (OCD) kao i da se podstaknu na aktivnije uključenje građana u širi proces donošenja odluka.

Entitetski savezi su angažovali nezavisne eksperte koji su u saradnji sa ReLOaD projektom, razvili kriterije, matricu za bodovanje, te upitnik za JLS. Prilikom definisanja kriterija vodilo se računa o razlikama između razvijenih i manje razvijenih JLS. Također, pored toga što će se u kvantitativnom smislu mjeriti dodjela sredstava na transparentan način i putem projektnog pristupa, vodiće se i računa da bodovni sistem reflektuje i značajne suštinske pomake koje je neka JLS napravila, kao na primjer: dodjela sredstava po principima LOD metodologije za boračku populaciju (koja se smatra posebno izazovnom i senzibilnom grupom), vrijednost pojedinačnih projekata koje JLS finansira, inovativni alati za dvosmjernu komunikaciju sa građanima i drugo.

Prakse koje se primjenjuju u JLS verifikuju se na osnovu odgovora u upitniku koji je proslijeđen svim partnerskim JLS. Nakon što se zaprima odgovori i izvori verifikacije, komisija sačinjena od predstavnika ReLOaD projekta, SOGFBiH i SOGRS izvršiće ocjenjivanje po kriterijima nakon čega se izrađuje preliminarne rang lista JLS koje imaju najbolje prakse u oblasti transparentnog finansiranja i oblasti uključenja građana u procese donošenja odluka.

ReLOaD projekat je u saradnji sa SOGFBiH i SOGRS prvobitno planirao da organizuje ceremoniju za dodjelu priznanja i proglašenja najboljih praksi u obje gore navedene oblasti, međutim uslijed vanrednih okolnosti uzrokovanih pandemijom, odražavanje ceremonije neće biti moguće te će se primijeniti alternativni načini za dodjelu priznanja i promociju najboljih praksi.

#ReLOaD
Regionalni program
lokalne demokratije
na Zapadnom Balkanu



U tu svrhu Savez je 29. maja objavio javni poziv za izbor eksperta - grafički dizajner. Grafički dizajner se bira sa zadatkom da izradi brošuru, fact sheet i animacijski klip kojim će se predstaviti proces izbora najbolje prakse u ReLOaD partnerskim jedinicama lokalne samouprave. Tekst javnog poziva možete pogledati na sljedećem linku: [Javni poziv ReLOaD](#)
Regionalni program lokalne demokratije na Zapadnom Balkanu - ReLOaD finansira Evropska unija a provodi Razvojni program Ujedinjenih nacija (UNDP).

RADIONICE O NACRTU ZAKONA O GRAĐEVINSKOM ZEMLJIŠTU



Savez općina i gradova Federacije BiH je, u saradnji sa Federalnom upravom za geodetske i imovinsko-pravne poslove, 11.03.2020. godine u Mostaru održao prvu od četiri planirane regionalne radionice za jedinice lokalne samouprave na kojima će se predstaviti i razmotriti Nacrt Zakona o građevinskom zemljištu. Ovaj Nacrt je utvrdila Vlada Federacije BiH 03.10.2019. godine, a nakon toga su i oba doma Parlamenta Federacije BiH usvojila isti. Radi se o veoma važnom zakonu za jedinice lokalne samouprave i zbog toga je značajno da se što veći broj predstavnika općina i gradova uključi u javnu raspravu i da kroz primjedbe i komentare daju svoj doprinos s ciljem izrade što kvalitetnijeg teksta zakona. Preostale tri radionice će se održati u Bihaću, Sarajevu i Tuzli, nakon kojih je planirana završna sesija.




WEBINARI ORGANIZOVANI U SARADNJI SA SAVEZOM

- Webinar za predstavnike JKP "Upravljanje vodnim uslugama u svijetlu pandemije COVID-19"

Međunarodno udruženje preduzeća za vodosnabdijevanje u slivu rijeke Dunav (IAWD) i Svjetska banka u saradnji sa Savezom općina i gradova FBiH organizirali su webinar na temu: "Upravljanje vodnim uslugama u svjetlu pandemije COVID-19". Webinar je održan 7. maja 2020. godine.



- RCDN Webinar „Saradnja općina i javnih vodovodnih preduzeća u pružanju vodnih usluga za vrijeme COVID-19 pandemije“



Regionalna mreža za razvoj kapaciteta (RCDN) za usluge vodosnabdijevanja, odvodnje i prečišćavanja otpadnih voda, u saradnji sa Savezom općina i gradova Federacije BiH organizirala je 12. maj 2020. godine webinar na temu: „Saradnja općina i javnih vodovodnih preduzeća u pružanju vodnih usluga za vrijeme COVID-19 pandemije". Webinaru je prisustvovalo više od 80 učesnika, predstavnika jedinica lokalne samouprave, javnih komunalnih

preduzeća iz oblasti vodosnabdijevanja i odvodnje, saveza lokalne samouprave i udruženja vodovodnih preduzeća iz četiri zemlje Zapadnog Balkana: Bosne i Hercegovine, Crne Gore, Sjeverne Makedonije i Srbije.

Na sljedećem linku možete pogledati zaključke koji su proistekli iz webinara: [Zaključci](#)

**KORISNI LINKOVI ZA FONDVE
EU:**

www.southeast-europe.net
www.adriaticinnovationmap.eu
www.adrioninterreg.eu
www.europa.ba
www.cbibplus.eu
www.cbc.bih-mne.org
www.srb-bih.org
www.interreg-hr-ba-me2014-2020.eu
www.programmmed.eu
<https://tacso.eu/>
<https://euinfo.ba/en/>
www.balkanfund.org
<https://eacea.ec.europa.eu>
www.welcomeurope.com

Izvještaj daje
 komparativnu sliku
 stanja sektora
 upravljanja otpadom
 kako na nacionalnom,
 tako i na lokalnom nivou
 u zemljama jugoistočne
 Evrope

- Webinar za službenike za odnose sa javnošću u jedinicama lokalne samouprave

27. i 29. maj / svibanj – Webinar na teme Iskustva u kriznom komuniciranju u zemljama regiona za vrijeme pandemije i Teoretske preporuke i iskustva iz prakse u radu sa lokalnim vlastima u Hrvatskoj organizovao je Savez općina i gradova Federacije BiH i Savez opština i gradova Republike Srpske, u partnerstvu sa Švedskim Savezom lokalnih vlasti i regiona, uz finansijsku podršku Vlade Švedske i Švajcarske.

Webinar je vodio Krešimir Macan, ugledni hrvatski PR stručnjak specijaliziran za krizno komuniciranje, strateško komuniciranje u politici i nove društvene medije.

- Webinar „Lekcije iz pandemije COVID-19 za osiguranje kontinuiteta poslovanja vodnih usluga“

NALAS (Mreža asocijacija lokalnih vlasti jugoistočne Evrope) u suradnji sa Međunarodnim udruženjem vodovoda u slivu Dunava (IAWD) i Savezom općina i gradova FBiH 28.05.2020. godine organizirao je webinar „Lekcije naučene iz pandemije COVID-19 za osiguranje poslovanja vodnih usluga“.

- RCDN Webinar „Finansijski aspekti poslovanja vodovodnih preduzeća u svjetlu COVID-19 pandemije i podrška jedinica lokalne samouprave“

Regionalna mreža za razvoj kapaciteta (RCDN) za usluge vodosnabdijevanja, odvodnje i prečišćavanja otpadnih voda, u suradnji sa Savezom općina i gradova Federacije BiH organizirala je 9. juna 2020. godine webinar na temu: „Finansijski aspekti poslovanja vodovodnih preduzeća u svijetlu COVID-19 pandemije i podrška jedinica lokalne samouprave“.

Na sljedećem linku možete pogledati zaključke koji su proistekli iz webinaru: [Zaključci](#)

Savez općina i gradova FBiH, u suradnji sa NALAS-om, objavio je pozive za sljedeće Online besplatne kurseve:

- Upravljanje rizikom od katastrofa;
- Uvod u rodnu ravnopravnost na lokalnom nivou;
- Uvod u upravljanje imovinom u sektoru voda.

IZVJEŠTAJ – BENCHMARKING UPRAVLJANJA ČVRSTIM OTPADOM U JUGOISTOČNOJ EVROPI



Savez općina i gradova FBiH je bio aktivno uključen u pripremi izvještaja Benchmarking upravljanja čvrstim otpadom u Jugoistočnoj Evropi putem svog predstavnika u Radnoj grupi. Ovaj izvještaj daje komparativnu sliku stanja sektora upravljanja otpadom kako na nacionalnom, tako i na lokalnom nivou u zemljama jugoistočne Evrope. Kao drugo, ovaj dokument ima za cilj da prati trendove u praksi upravljanja otpadom u zemljama regije i prati napredak ka ispunjavanju EU standarda u ovoj oblasti. Nadalje, Izvještaj će pomoći Savezu u pripremi materijala i argumenata za kreiranje politika, ali i prijedloga budućih razvojnih projekata ili programa.

Konačno, ovaj dokument ima svrhu podizanja svijesti u smislu promocije i komuniciranja o novim trendovima i politikama upravljanja otpadom i povezanim temama koje je uvela EU. U ovom konkretnom slučaju tema kružne ekonomije uvedena je proširivanjem metodološkog pristupa s dva dodatna pokazatelja, jednim lokalnim i jednim nacionalnim, te anketom o osnovnom konceptu i načelima cirkularne ekonomije među članovima radne grupe NALAS SWWM.

Izvještaj je dostupan na Engleskom jeziku. Savez će u narednom periodu ovu publikaciju (ili njen dio) prevesti na lokalni jezik za svoje članice. Izvještaj možete pogledati na sljedećem linku:

[Izvještaj](#)



Musala 5/1

71000 Sarajevo

Telefon: ++387 33 216 502, 209 024, 209 120

Fax: ++387 33 552 810, 216 502

E-mail: dino@sogfbih.ba

Pratite nas na:

Gledajte Savez općina i gradova
Federacije Bosne i Hercegovine na

YouTube

Pratite Savez općina
i gradova FBiH na



facebook

Savez općina i gradova Federacije Bosne i Hercegovine

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način pružamo informacije o održanim sjednicama organa i tijela Saveza, konferencijama, seminarima, radionicama, okruglim stolovima, javnim raspravama, .

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba

Molimo vas da informacije o našem biltenu prosljedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza koji je brz i efikasan način komuniciranja.

Sa zadovoljstvom očekujemo vaše komentare, sugestije ili primjedbe.

ODRŽANA ONLINE SJEDNICA GENERALNE SKUPŠTINE NALAS-A

1. maj / svibanj - Generalna Skupština NALAS-a (Mreža lokalnih i regionalnih vlasti Jugoistočne Evrope) se održala u periodu od 27. - 30.04.2020. godine.

Zbog pandemije korona virusa, Skupština je po prvi put održana elektronski.

Predstavnici Saveza općina i gradova Federacije Bosne i Hercegovine, gospodin Ivan Vukadin, načelnik Općine Tomislavgrad i gospodin Edis Dervišagić, gradonačelnik Grada Gradačac su uzeli aktivno učešće na ovom događaju.

Glavne odluke ovogodišnje Skupštine uključuju odobravanje aktivnosti i finansijskog izvještaja za 2019. godinu, plan rada i budžet za 2020. godinu, kao i odluku o prihvatanju Udruženja lokalne autonomije Albanije kao pridruženog člana NALAS-a.

Ovom prilikom je gospodin Emanuil Manolov, iz Bugarske izabran za novog predsjednika NALAS - a.



SASTANAK SA ASOCIJACIJOM OPĆINA TURSKE

COVID -19, reakcija, napori i poduzete aktivnosti asocijacija lokalnih vlasti su teme online sastanka Saveza općina i gradova Federacije BiH (SOGFBiH) i Asocijacije općina Turske (TBB), održanog 20.05.2020. godine. Sastanak je bio prilika da se razmijene iskustva i mišljenja u borbi protiv pandemije virusa Covid-19, kao i o budućoj saradnji asocijacija.

Na sastanku su učestvovali gospodin Ivan Vukadin, predsjednik Predsjedništva Skupštine Saveza općina i gradova FBiH, gospođa Fatma Sahin, predsjednica Turske asocijacije općina, gospođa Vesna Travljanin, direktorica Saveza općina i gradova FBiH i gospodin Buirol Ekici, generalni sekretar Turske asocijacije općina.

